

INUIT ATAQATIGIIT

Inatsisartuni



UKA 2018/196
08.10.18.
Aqqaluaq B. Egede

Uunga siunnersuut: Pigisanit pissarsiat ilaasa akileraaruserneqartarnerat pillugu Inatsisartut Inatsisaata allanngortinneqarneranik Inatsisartut inatsisaat nr. xx, xx. xxx 2018-imeersoq (Akileraartussaasut ilaneqarnerat aamma inatsisip atuuffianik millisitsineq)
(Aningaasaqarnermut Naalakkersuisoq)

Aallartissutigalugu Inuit Ataqatigiinniit erseqqissassavarput utoqqalinersiat pillugit inatsisissatut siunnersuummut attuumassuteqartut pillugit allannguinerit peqqissaarussamik aamma sukumiisumik Naalakkersuisuniit nassuiaatigineqarnissaat kissaatigisgatsigu. Naak inatsisissatut siunnersuut immini annertuunik tikkuagassartaqanngikkaluartoq Inuit Ataqatigiinniit erseqqissartikkusutavut arlaqarput.

Oqaatigissavarput siunnersuut una Inatsisartut aningaasaqarnermut Akileraartarnermullu Ataatsimiititaliaani sammineqartussanngorlugu ingerlatikkumagatsigu. Ilaatigut inatsisissap allannguuteqartinneqarnerata kingorna atuisunut toqqaannartumik sunniutissat erseqqissarneqarnissaat pisariaqartikkatsigu.

Inatsisissami allannguut § 3 malillugu qulaequtaq, tassalu ima oqaasertalik, "Paasissutissanik nalunaartussaataaneq" atorunnaarsinneqarpoq. Oqaasertallu nutaat taarsiullugit ikkunneqartut, oqaasertanut atorunnaartunit allaanerussutaat ataatsimiititaliaami qulaajarneqarnissaat kissaatigaarput.

Inatsisissami inuunermut sillimmasiissutini aamma soraarnerussutisiaqarnissamut ileqqaakkanut attuumassutillit allannguuteqartinneqarnissaasa toqqaannartumik isummerfiginngikkaluarlugit Inatsisartut Ataatsimiititaliaanni suliap sammineqareernissaannut Inuit Ataqatigiit ersarinnerusumik isummernissarput pissaaq. Neriulluta suliassaq manna ataatsimiititaliap aamma Naalakkersuisut pitsaasumik suleqatigiiffigissagaat.

Taamatut oqaaseqarluta suliassaq Inatsisartut Aningaasaqarnermut Ataatsimiititaliaannut ingerlatinneqassasoq inassutigaarput.